


## LESSON 5

\* January 27 – February 2

# Gamdang ah Pasian Phatna Lasa



---

### SABBATH NITAAK

**Tu Kaalsung Simding:** Late 79:5–13; 88:3–12; 69:1–3; 22:1; 77; 73:1–20; 1Pet. 1:17.

**Kamngah:** “Topa’ la, gamdang ah bangci sak theih ding ihi hiam?”  
(Late 137:4).

**L**ate 1 pulaak leitung in mawhna, siatna, gimna, satna tuamtuan tawh kidim ahihna thu mikim tuahkhak thu hi. Piansak nate in Topa bawlsa ahih bang mahin nate in tuni dongin a om uh hi. Piansak nate in siatnah hangin lauhuai-na tawh kipelh lo uh hi. Mawhna pung semsemin Pasian tate in leitungah gimna thuakin hih leitungah “khualmi bangin” nuncta uh hi. Hih thu in Late gelhpa buaipih thu mah hi: Koi bangin khualgamah upna tawh nuncta thei ding i hiam?

I pulaaksa bangin Late gelhpa in na khempeuh tungah ukna nei Pasian theihtelna a pulaa hi. Amah in dikna tawh kidimin thuman thutak tawh thukhen hi. Pasian in a tawntungin vangliatna tawh kidim a, Amah in tawntung belhna mun amauta in amu thei uh hi. Hih thu hangin Late gelhpa in gimna a tuahciangin lungmangin a omkha zel hi. Tua bangin Pasian ompihna a phawk khak loh hun ciangin Topa mai-ah siatna in ukna nei tawh kibang hi. Late sungah tua bangin siatna le Topa hoihna kibang lo ahihna thu kimu thei hi. Tua bangin gimna a thuak ciangin Pasian ompihna om lo bangin a pulaak hi. A dang khatin pulaak hi lehang Late gelhpa in Pasian ompihna ahi zongin Ama ompih lohna thute a pulaakna kimu thei hi.

\*February 3, Sabbath a ding kigingkhol in tu kaal lesson sim in.

## Siatna Nite

### **Simin, Late 74:18–22 le Late 79:5–13. Bang lauhuai thu kipulaak hiam?**

Late gelhpa in Pasian le Satan kikal kido-na thu a pulaak hi. A kipulaak khia theilo Pasian lungduai-na, pilna le liatna thute zong a pulaak hi. Late sungah bangci bangin siatna hong piang thei hiam cih thu in Pasian thu thuk lian mahmah khat ahihna thu zong honghilh hi. Tua hi-in Jerusalem le biakinMPI kisiatna zong Pasian thukhenna khat hi, ci-in kimu thei hi. Bang hang hiam cihleh thu-um mite hangin dawi bia mite in Pasian langpanna, gensiatna hong tung hi. Pasian go le gamh ahi Israelte in Pasian tawh thuciam bawlin Pasian teltuam minam ahi uh hi (*Thkna. 4:32–38; 32:8, 9*) tua thuciam in mangthang ngeilo ding hi. Pasian gamh mi hihna sungah leitung hun bei ciangin a piang ding thu zong kihel hi. Ni khat ni ciangin Israel mite in minam te in Pasian gamh lúahte hongsuak ding uh a, Ama na bek a semding uh hi.

Minamte in Pasian gamh ding ahihna sungah Pasian kamciamte zong a kihel hi. Thuciam mite in Pasian tawh a kizopna-ah thupalsatna hangin gimna thuak uh hi, cihthu nial theih hilo hi (*Late 79:8, 9*). Mihing nuntak khuasakna in Pasian hehpihna tung bekah kinga hi. Mawh maisakin hong bawlpha-in Amah tawh kizopna hong bawlsak hi. Topa in “Eite kihotkhiatna Pasian hi.” Amah in a kamciamte a pelh kei hi (*Late 79:9*). Ahizongin a thupi zaw in Israelte in namdangte mai-ah Pasian zia le tong a kilangh sak ding uh hi (*Late 79:9*). Namdangte in siatna sungah nungta uh himah taleh Pasian thukhenna a thuak nai kei uh hi. Pasian in vangliatna nei nawnlo bangin kingaihsun hi (*Late 74:18–23; 83:16–18; 106:47*). Pasian in a mite a hotkhiat ciangin Ama min in amauta dikna ngahsakin a tawisang hi.

Nidang huna thuman in tuni, tuhun ah zong thuman hi. I mawhnate, i siatnate in gimna hongpuak bekthamlo-in Pasian min in mindai-na a piangsak hi. A manlo i gamtatnate in thu zuihna le thu upna zong susia hi; i tecu panna le na sepnate zong susia hi. Khrih thu um mite gamtat zia le tong hangin mi khat ii pukna a upna nusiatna a piangsak hilo hiam? “Pasian pahtawi-na, Khrih pahtawi-na sungah A mite gamtat zia le tong kicinna zong a kihel hi.” Ellen G White, *The Desire of Ages*, p. 671.

**Koi bangin thuman thutak theihtelna a thupi-na na thei hiam? Na nuntakna-ah bang khiatna nei hiam?**

## Na Mai-ah Sihna

**Simin**, Late 41:1–4; 88:3–12; le Late 102:3–5, 11, 23, 24. Hihte in bang thute pulaak uh hiam? Na nunna sungah na tuah ngei thute a om hiam?

Tua thunget nate in natna panin damna ngahna ding le sihna panin a hong suahtaksakna thute kimuthei hi. Ahizongin amautē in leitung siatna tawh kipelh theilo uh hi. Sihna guam tawh kinai takin a nungta hi. A lawm a gualte nawlkhinna a thuak hi. Gim thuakin lamet bei-in a nungta hi. A guh bek om a, a vun teng tolkhia khin hi. Topa in a mite gimthuak dingin phal hi, cihthu kimu thei hi. Bang hangin gimna thuak uh hiam cihleh Israelte'n Pasian thupiakte nawlkhin uh hi. Late gelhpa in mawhna in natna, hong tun hi, cih a thei hi. Tua ahih manin amah in mawhmai-na le damna thu zong a pulaak hi (*Late 41:3, 4*). Bangbang ahizongin Late bu kimkhat, *Late 88* le *Late 102* ama khialhna hilo-in gimthuak mi om ahihna honghilh hi. I tel zawhloh thu himah taleh, Pasian mite in gim thuak uh hi. *Late 88* in Pasian in a man lopi-in gim pia mite tungah thukhen ahihna zong kimu thei hi (*Late 88:6–8*). Ahizongin tua bang gimna a tuah uh ciangin amautē kahna awgingte in upna tawh a pulaak uh ahi hi. Amah in a gim a tawl a tate a phuahpha thei hi.

Sihna limguam sung a tung mi khat in Pasian hong itna, a lamdang a sepnate le thu tanna, dikna thute a pulaak hi (*Late 88:10–12*). Pasian phalna hangin tua bangin gimthuak himah taleh Late gelhpa in Pasian tung bekah a kinga hi. Amah in gimthuakna sung panin Pasian hong itna phawk thei hi. Amah bekmah hotkhiatna hi, cih athei thei hi. Tua bangin a thuum nate tungtawn in Late gelhpa in gimna thuak himah taleh Pasian in hehpihna le itna tawh kidim Pasian hi ci-in a pulaak hi.

A tomin pulaak lehang, Pasian in vangliatna khempeuh nei himah taleh a mite'n gimthuak dingin phal hi. Amaute gimthuak na panin a honkhia pen midang hilo-in Pasian mah ahihna thu pulaak hi. Pasian in na khempeuh uk hi, ci-in theihna in lametna hong guan hi. Khrih gimthuakna siksan in *Late 88* i sim ciangin Ama hong itna thukpi in i telzawh hilo itna hi, ci-in i theithehi hi. Mawhna hangin sihna thuak Khrih ngaihsun in.

**Koi bangin Khrih gimthuakna na muthei hiam? I thuak gimna sangin a a lianzaw gimna a thuakte, gentheihna a thuakte in upna tawh kalsuan uh hilo hiam?**

## Pasian Koi-ah Om hiam?

**Simin**, Late 42:1–3; 63:1; 69:1–3; le 102:1–7. Late gelhpa in bang hangin gimna thuak hi ding hiam?

Mimal bekthamlo-in mihon in gimna a thuakna-ah Pasian in amaute thuakna a kinlo bangin kipulaak hi. Tua bang gimna sungah a nuntakna-uh ah Pasian hutna ngahlo bangin om uh hi. Tui omloohna sehnel gam keu bangin a nunzia uh kipulaak hi (*Late 42:1–3; 63:1*). Si thei mihing in lunggimna tawh nungta hi (*Late 102:2–4*). Late gelhpa in Pasian kiangpan gamla-in nungta-in lawm neilo vasa tawh a nunzia kipulaak hi. “Gamlak a om musane le mun kolhna-ah a om simbu tawh ka kibang hi. Ihmu theilo-in ka om a, innkhum dawna vasa khat guak a om tawh ka kibang hi.” (*Late 102:6, 7*).

Tua bangin gam simtham sung nunna in Pasian tawh kizopna neilo nunna hi, ci-in honghilh hi. Vasa khat in a bu omna panin gamla mun khat ah amah guak omin tawlgak nading mun a zong kawikawi tawh kibang hi, ci-in pulaak hi. Late gelhpa a omna guamthukpi sung panin hotkhiatna ngah dingin Topa tungah a kiko hi. Amah in tuikia mi khat bangin siatnate sung panin suahtakna a zong mipa tawh kibang hi (*Late 69:1–3; 130:1*). Hih bangin limciin nate in suahtak nading neilo-in lamet bei-na panin Topa hotkhiat ding lamen in a nungta mite nunna pulaak hi.

**Simin**, Late 10:12; 22:1; 27:9; le 39:12. Koi bangin Late gelhpa in gimna thuakin Pasian in hong ompihlo hi, ci-in ngaihsutna dawngkik hiam?

Late gelhpa in Pasian in hong ompih lo hi, ci-in ngaihsutna in manlo ahihlam a pulaakkik thei hi. Late gelhpa in Topa in thungetna hong dawng hi. Banghang hiam cihleh thungetna in vangliatna le hehpihna tawh a kidim Pasian tawh kizopna ahihlam a thei hi. Pasian in amah tawh omkhawm in gimna thuakin Pasian ompihna ngahkhalo-in a kingaihsut hangin Pasian ompihna in amah taisan ngeilo hi, ci-in zong a thei hi. Pasian in kikhel ngeilo Pasian hi. A beisa hunin Topa huhnate phawkikin, mailam hunah zong Topa ompihna ngah ding ahihna zong a mukhol thei hi. Lungzinna a thuah ciangin Pasian in nusialo-in hongcing hongkem tawntung ahihna zong a pulaak hi. Pasian in a tawntungin gimthuak dingin phallo ahihna a thei ding uh hi. Late Bute in bangbang i thuak zongin Pasian tawh kizopna in tatsatlo-a a tawntungin kizom paisuak ding ahihna honghilh hi.

**I nuntakna-ah langdona i tuahkhak ciangin Late gelhpa nunzia-in bang thu nuntakpih thei ding i hiam? Bang in na upna hong kipsak hiam?**

## Ama' Kamciamte Maimang Suak ding hiam?

### **Simin, Late 77. Late gelhpa in bang thuak kha hiam?**

*Late 77 in Pasian tung panin huh ngetna tawh kipan hi. Amah in dahna lungzinna tawh kidim in a om hi. A beisa a nuntakna sungah gimna tampi paisankhin hi (Late 77:1–6). Topa kiang pan hongpai hehnepna lo buang kuama tung pan huhna lametna a nei kei hi. Mite tung pan huhna a om phial zongin a nial hi. Ahizongin Pasian huhna bekmah a lunggulna kimu thei hi. “Topa ka phawk ciangin ka tau hi” (Late 77:3). Hebrew in kigelhna-ah “hamah” tawh kigelh a, a khiatna in, “dah” “tau” cihna hi. Luitui ging bangin tau-na pulaak kammal hi (Late 46:3). Late gelhpa in mihing nuntakna-ah tawldamna mukha ngeilo ahihna zong pulaak hi. Koi bangin tua bangin lunggimna i tuahkhak ciangin Pasian ompihna pulaak thei ding i hiam? (Late 77:7–9): Pasian in kikhel ngei hiam? Pasian in A mite tawh kamciam pelh ngei hiam?*

A beisa hunin Pasian hotkhiatna ngah himah taleh tu-in Pasian ompihna omlo bangin a kingaihsut hun enkak in. Hih bang kibat lohna thute i ngaihsut ciangin, Pasian in kikhel ngei ahihleh, mihing in lametna koi pan ngah ding i hiam? Late gelhpa in lamet neilo bangin kingaihsun a, a tawpna-ah zawhna ngah dingin a kalsuanna mainawt veve hi. Tua bangin a om laitakin Late gelhpa in ihmoo theilo-in om hi. Bang hang hiam cihleh Topa in ihmoo theilo dingin a phonglo den hi (Late 77:4). Hih in kamsangte sawltakte in lamdang takin Pasian in ompih in Ama geelnate tangtung dingin nasem ahi hi (Pian. 41:1–8, Esther 6:1, Dan. 2:1–3). Tua bangin zan tampi ihmoo lo-in a omna panin a beisa hunin Topa hotkhiatnate a phawkkik hi. Tua panin lametna thak tawh nungta hi (Late 77:5, 10). Tua hi-in Pasian cihtakna sungah a nungta mi (Job) bangin Topa a muangte in nopna a ngah thei uh hi. Late gelhpa in Topa sungah upna kip nei dingin a hong hanthawn hi. Tua Pasian in gimthuak a mi Israelte lamdang takin a honkhia hi (Late 77:11–18). Late gelhpa in ‘mihing in a theih khak loh Topa khekhap in hoihna tawh kidim hi, ci-in a pulaak hi (Late 77:19); mihing in lamet bei kisa-in gimin tawlin a om hangin Topa makaihna in a ompih tawntung hi. Tua Topa nasepnate kimu lo hi mah taleh Amah i phat tawntung ding kisam hi. Bang hang hiam cihleh Ama lampi in vanglianin mihing tel zagh ding hilo hi.

**Na nuntakna sungah Pasian hong ompihna, a nasepna cihte ngaihsun in. Koi bangin Tua thute in bang bang na tuak zongin zawhna hong ngahsak thei hiam?**

## Midik in zongh Ze-etna Thuak

**Simin, Late 37:1, 8; 49:5–7; 94:3–7; le 125:3. Late gelhpa in bang hamsatna thuak hiam?**

---



---

Hih Late in migilote tuahphatna nopsakna le midikte gentheih hamsat nate pulaak hi. Migilote in tuahpha bek tham lo-in khat veivei ciangin Pasian langpanin midangte zong nengniam uh hi. Hih thu hangin mi tampi in lungkham uh hi. “Gitlohma ciangkhut” (*Late 125:3*), gitlohma in leitung ukcip ahihna thu le “Dikna ciangkhut” in (*Late 45:6*) in guallel ding tawh kibang hi. Tua hi-in bang hangin gitlohma nusialo ding uh hiam?

**Simin, Late 73:1–20, 27. Late gelhpa in bang hamsatna thuak hiam? A kimang nate a muangte in bang ngah ding uh hiam? (*1 Pet. 1:17*)**

---

*Late 73* in leitung gitlohma pulaak hi. Hih thu hangin Pasian muhtelna hong dal hi. Migilote daupai mah taleh amah in upna sungah zungthuk kha-in kiptakin a kalsuan hi. Thuman thutakte siksanin thu upna nei ahihna kimu thei hi. Ahi zongin *Late 73* in upna thu nusia-in siatna sung a nuncta mite zahpihna thu zong kimu thei hi. Israelte Pasian in bangzahin hoihna tawh kidimin thuman thutanna tawh nuncta ahihna thu kimu thei hi.”—Johannes Bugenhagen, *Reformation Commentary on Scripture* (Downers Grove, IL: InterVarsity Press, 2018), p. 11.

Late gelhpa in vanglian Pa Pasian vangliatna kimuhna mun biakbul mitsuanin a pulaak thute kimu thei hi. Hih in tuhun mite tungah migilote thuak ding Pasian thukhenna zong hong hilh hi. Late gelhpa in biakbul tawh kisai thuman thutakte theihtelna nei ahihlam zong kimu thei hi. A beisa-in a nuntakna in siatna tawh kidim ahihlam kiphawkin mawh kisikin vantung thuman thute tawh nuncta thei hi; tua thute mihing ngaihsutna in ciin zolo hi.

**Gitlohma tawh kidim miten thukhenna thuak lo bangin na muh hangin, Pasian in amaute tungah thukhen ding ahihna thu in koi bangin khamuanna hong guan hiam?**

**Ngaihsutbeh Ding:** Late 56; Ellen G. White, *Steps to Christ* sungpan “*Rejoicing in the Lord*” laimai 115–126, simin.

Late gelhte in Pasian mite in Topa nasepnate hangin Ama tungah lungdamna a puak tawntung uh hi. Bangci bangin gamdang ah Topa la sa thei ding i hiam, ci-in a lunggimna uh a pulaak uh hi. Pasian vangliatna lamdang sakna tawh kidim uh hi. Lai Siangtho tawh kituak upna in mailam hun adingin khamuanna hong guan hi. Khat veivei ciangin leitung siatnate i tuahkhak ciangin Pasian in hong ompihlo hiding hiam, cih ngaihsutna hong lutkha thei zel hi. Lungkia-in lamet bei-in na om ciangin Pasian hong kamciamte sungah khamuanna na nei thei hi. Ama hong itna le dikna tawh kidim Ama zia le tong in muantakcing, belhthamcing hi. Late gelhte in mailam lunghimawhna thu zong a pulaakna kimu thei hi. Lamet bei kisa-in a omna panin a bei ngeilo Pasian hong itna le Ama thumanna sungah lungmuanna i ngah thei hi (*Late 36:5–10; 89:2, 8*). “Na hamsatna panin Ama vangliatna mitsuanin na mainawt ding hi; na hamsatnate bek ngaihsun sun lo-in na omding hi. Topa kamciamte tawh na mainawt ding hi. A sawt lo-in na hamsatnate galah Zeisu na mu thei ding hi; Ama khut na len ding hi. Ama sungah upna na nei ding hi. Amah kimakaihsak in. Zeisu sungah upna tawh lametna nei-in na mainawt thei hi.”—E.G. White, *Testimonies for the Church*, vol. 5, pp. 578, 579.

Pasian ompihna na muhkhak loh hun ciangin thungetna manneihna na neu muhkha kei ding hi. Tua hi lo-in tua bang hamsatnate na tuahkhak ciangin Pasian hong hotkhiatnate na phawk ding hi. Kiniam khiatin Pasian hehpihna na zong ding hi (*Late 77:10–15, 12; 89:46–52*). “Hamsatna i tuah ciangin upna hong khauh semsem hi. Tua in uplahna khempeuh a do hi. Tua bangin hamsatna i tuahna panin i ngah thu in kham le ngun sangin manpha zaw hi.”—Ellen G. White, *Testimonies for the Church*, vol. 3, p. 555.

### Kikupding Dotnate:

- ① Late gelhte in siatna nam tampi a thuak hi. Tua bang hamsatna na tuah ciangin koi bangin na mainawt ding hiam? Koi bangin hamsatna na nawktan ding hiam?
- ② Hamsatna sungah Pasian upna i koih ciangin Pasian hoihna le dikna na mu thei hiam?
- ③ Koi bangin siatna tawh kidim leitung in Pasian vangliatna le itna mu thei veve hiam? Kido-na Lianpi in na tuah thute tungah zawhna na ngah thei ding hiam?